

Tusagassiorfinnut tapiissuteqartarnej pillugu Inatsisartut inatsisaata allanngartinneqarnissaa pillugu siunnersuut
(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Saqqummiussissut

Siullermeerneqarnera

Tusagassiorfinnut tapiissuteqartarnej pillugu Inatsisartut inatsisaat nr. 20, 28. november 2016-imeersumi § 24, imm. 4-mi aalajangersarneqarpoq Inatsisartut inatsisaata atuutilersinneqarnerata kingornatigut Inatsisartut inatsisaanniittut tapiissuteqariaatsit Naalakkersuisut ukiut marluk ingerlareerpata nalilersuiffigissagaat. Tamanna pissaaq nalilersorniarlugu tapiissuteqariaatsit siunertamut naapertuunnersut. Tusagassiorfinnut tapiissuteqartarnerup marlunnut avinneqarnera aalajangiunneqassanersoq nalilersuinermit ilaatinneqassasoq Inatsisissatut siunnersuutip isumaliutissiisummut tapiliussami uparuarneqarpoq.

Taassuma kingornatigut taamani Naalakkersuisuusut tusagassiorfinnut tapiissuteqariaatsinik atuuttunik avataaneersutut nalilersuititsipput, taanna nalunaarusiatut saqqummersinneqarpoq 2019-imilu Inatsisartunut agguanneqarluni. Nalilersuinermit inernilunneqarpoq tusagassiorfinnut tapiissuteqariaatsip 2017-2019-imi tusagassiuutinut neqeroortigineqartunut sunniuteqarsimanngitsoq. Naak taamatut iliuuseqartoqaraluartoq ukiut arlaqartut qaangiunneranni suli takuneqarsinnaavoq suliniutinut tapiissuteqariaaseq siunertaq malillugu ingerlanngitsoq, naatsorsuutigineqanngilarlu siunissami siunertaq malillugu ingerlalernissaa.

Taassuma ilutigisaanik takuneqarsinnaavoq suliniutinut tapiissutissatut aningaasaliinerit inatsisip akuersissutigineraniilli aningaasaliissuteqarnissamik qinnuteqarnikkut ingerlatsinermit tapiissutissanut aningaasaliissutinut illikartinneqartarsimasut.

Tamanna tunngavigalugu siunnersuut ilanngussaq siuliarineqarpoq suliniutinut tapiissuteqarnermut malittarisassat atorunnaarsinneqarnissaat siunertarlugu. Taassuma kingorna Inatsisartut inatsisaanni ingerlatsinermit tapiissuteqartarnermut malittarisassat taamaallaat allassimalissapput.

Tusagassiorfinnut tapiissutit annertussusissaannut tunngasut aninganut inatsimmi Inatsisartunit siunissami aamma aalajangiiffigineqartassaaq, inatsimmimi tusagassiorfinnut tapiissutit annertussusilerneqartarnissaat malittarisassanut ilaatinneqanngimmata.

Taamatut oqaaseqarlunga siunnersuut Inatsisartunut kajumittumik suliassanngortippara.